

BON DIA 	
Editor Caribbean Speed Printers N.V. Aruba Bank N.V. Acc.No 332668	
DIRECTOR	
John Chemaly John Chemaly Jr.	
GERENTE GENERAL	
Grace Mary Maduro	
CORDINADOR	
Benjamin Romero	
REDACCION	
Tito Lacle Delma Arends Margarita Els Oscar Vidal Maritza Faro Melvin Garcia Keven van Ommeren E-mail: noticia@bondia.com	
PROJECT EXECUTIVE	
Elisabeth Guanipa Genevieve Garcia	
REDACTOR DEPORTIVO	
Harold Faro Richard Brooks Andres Krozendijk Email: deporte@bondia.com	
COLABORADOR	
Michael Arends Dr. Carlos Viana Ronzo de Cuba Seever Krozendijk	
INTERNATIONAL	
Mariano Heyden Margatita Els (Antiyas) (Bonaire)	
FOTOGRAFO	
Debby Kelly Dino Tromp Jason Inesia	
REPORTERO	
Ludwig Hermans	
LAYOUT	
Glady's Palomino Dina Maria	
SALES	
Elly Erasmus Marijke Croes Luidens Wendy Kelboom	
AVISO Y ARTE	
Sandra Loeftop (Hefe Reservacion) Lando Rafael	
ADMINISTRACION Y DISTRIBUCION	
Eduard Martijn (Hefe) Jenny Lobbrecht Martha Ariza Natasha Ramos	
COLLECTOR	
Marieta Tromp	
PRE PRESS	
Luis Fernando Arenas (Hefe) Pablo Libre	
PRESS	
Ronald Schenker (Hefe) Omar Ramirez Martin Boekhoudt	
RECEPCIONISTA	
Mariela Carrera	
AGENDA DI NOTICIA	
Associated Press Editor's Press United Media Reuters	
AFILIACION	
Sociedad Interamericana di Prensa (SIP)	
DIRECCION	
Weststraat 22 Tel: 582-7800 / Fax: 582-7044 Email: noticia@bondia.com BON DIA ARUBA	

Ta un corant redacta y imprimi na Aruba
y ta obtenibel di Dialuna te cu Diasabra
Ningun contenido por wordo reproduci
sin permiso di Editor.
www.bondia.com

Editorial



Festival di Calypso y Roadmarch a crece bai laga SAC hopi atras

Hende grandi tin cu keda grandi y ora cu hende grandi ta insisti di lunga wegá di mucha, nan ta sali cai, mal gecai.

Esaki ta e unico conclusión cu por saca for di henter e badabada di calypso y roadmarch, cu realmente Stichting Arubaanse Carnaval, a crea e siman aki atrobe pa su mes y pa tur hende. Hecho ta, cu no ta pasa un año, sigur pa loke ta e ultimo diez añanan, cu e festival unico aki, e mas grandi cu nos pais conoce, ta ser confronta cu problemanan cu nunca mester tabata problema, si tur hende realiza e balor di e festival di calypso y roadmarch.

No solamente pa carnaval pero pa henter e celebracion di un pueblo, cu ta gusta su fiesta di carnaval y cu masalmente a bin ta sostene e festival aki pa henter su existencia. Pa algun año caba ta surgi conflicto entre SAC y musiconan y realmente e momento a yega pa tur hende analiza kico tin cu haci, con lo tin cu haci esaki, pa segura cu e festival grandi aki, ta pa musiconan y di musiconan.

Cu e ta ser organiza den e temporada di Carnaval no ta haci e festival propiedad di SAC, enotabira un festival cu e organizacion aki por haci y deshaci cune y mester tin leynan cu por para SAC den seco, cu e creencia cu e festival aki ta solamente di SAC. Pero en parti no por culpa SAC solamente di e situacion aki, ya cu e musiconan local tambe, pa añanan largo, no a bin ta realiza cu e festival aki ta di nan, cu nan mester ta e pilar principal di e festival, y cu nan mes tin cu para pa nan derecho wordo respeta y nan mes como musico wordo respeta.

Ta increíbel con tanto hende talentoso asina, hendenan cu ta presta nan mes pa gasta basta placa, pa cumpra aparatonan musical, cu ta paga basta placa pa areglo y composicion, ta permiti otronan, cu no tin nocion pa nada di mundo kico e safriconan aki ta, domina nan interesnan di e forma aki.

SAC no por ta ni mas ni menos c'un fundacion cu ta organiza e festival di Calypso y Roadmarch den e temporada di Carnaval. Enberdad nan tin e permiso pa organiza e festival den e periodo aki, pero e permiso hamas y nunca ta determina cu SAC ta doño di e festival, y ta determina kende por canta, kende no por canta, y kico nan por y no por pone den nan letranan.

Ta increíbel cu tur año e situacion aki ta sigui presenta su mes, ya cu e ta muestra tanto incapacidad di e propio musiconan, contra mas incapacidad di e organización di SAC, ya cu realmente e problemanan aki ta sigui manifesta nan mes, pa tanto incapacidad cu ta sigui existi.

E solo hecho cu cantantenan, bandanan, musiconan, compositornan y areglistanan, ta acepta reglanan ridiculo cu SAC a impone e año aki pa loke ta nan obranan, y ta bai participa den e festival mancha aki, den cual nan ta ser obliga di actua contra di nan propio interes, ta muestra di esaki. E hecho cu ayera tardi algun banda a dicidi di reuni pa mira

si nan lo bai pariba awenochi, esta na Centro di Barrio Lago Heights pa participa den e gran final, ta muestra caba di nan incapacidad, ya cu e reunionnan aki mester a tuma lugar for di momento cu SAC a dicidi di impone condicionnan cu hasta tin un tinte político, ya cu no por splica e decisionnan aki.

Desde ki tempo un cantante di calypso y roadmarch, no ta ser permiti pa critica un Gobierno? Ki poder dirigentan di SAC tin cu nan ta dicidi cu nan no por wordo critica pa nan maneho? Pa nan decisionan cu nan ta tuma den organización di e fiesta di pueblo aki cu yama Carnaval?

Musiconan ta e wes'i lomba di e festival di tumba y di calypso y roadmarch y principalmente e ultimo aki, ta e fuente principal di entrada pa SAC, cu realmente ta mal usa nan permiso di e festival aki.

Na momento cu den un pais un organización ta determina pa kita derecho di critica, kita derecho di opinion y kita derecho di expresion for di cualkier persona, cualkier organización y cualkier banda musical, e organización aki no tin derecho di existencia.

Ta keda responsabilidad di esun cu ta haci un expresion, di carga e consecucionan di loke e ta expresa y si tin un hende of organización ta sinti nan mes insulta of inhumamente trata pa e expresionnan aki, nan tin e caminda legal pa cana, manera nos constitucion a regla pa tur hende.

Algo ta robez ora cu constata, cu cantantenan cu realmente ta cantante, cu ta biba di cantamento, no ta den e final mientras cu tin cantantenan cu pa un siman ta cantante, si ta den e final aki. E hecho c'un miembro di hurado ta muestra cu nan tabatin un decisión y c'otro comision di SAC a tuma otro decisionnan, ta muestra cu cosnan no ta bon y cu SAC ta trata e gran festival aki, manera cu ta cantamento tin bou di palo di kwihi.

Ta un berguena e cos aki ta, cu SAC mes ta crea problema caminda no mester tin problema, ta crea disgusto caminda no tin disgusto y ta hinca su mes den un situacion caminda solamente antipatia e por cosecha.

Den bida tur cos ta wordo determina a base di respet muto, a base di cooperacion, a base di confianza, y net e aspectonan aki ta haci falta den e relacion cu SAC, como organizador principal di carnaval, mester tin cu e bandanan.

Cu varios banda cu a clasifica a dicidi cu nan no ta participa awe nochí mas, ta nan derecho pero e posicion aki mester a ser tuma for di siman pasa, prome cu e festival pa asina no permiti e situacion cu tin na e momentonan aki, tuma lugar. Cu mester bin cambio den e situacion aki ta berdad, y kizas Anthony Garrio tin razon total di sugeri pa tene un festival grandi mei mei di año, di calypso y roadmarch y laga SAC purba haya algun hende pa su festival di otro año.

Pero realmente, den un mundo di hende grandi, hende tin cu keda grandi y no bira chikito y actua manera mucha chikito den un evento asina grandi.